



Broj: 01-50-1-15-56/09  
Sarajevo, 24. juni 2009. godine

**ZAPISNIK**  
**56. sjednice Predstavničkog doma**  
**Parlamentarne skupštine Bosne i Hercegovine,**  
**održane 24. juna 2009. godine**

Sjednica je počela u 10 sati. Prisustvovalo je 36 poslanika. Odsustvo su opravdali: Bakir Izetbegović, Jovan Todorović, Azra Hadžiahmetović, Milica Marković, Lazar Prodanović i Savo Erić.

Iz Vijeća ministara BiH sjednici su prisustvovali ministri: Sredoje Nović, Tarik Sadović, Božo Ljubić i Safet Halilović te zamjenik ministra Vilim Primorac.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, EUPM-a, USAID PSP u BiH, Ambassade Velike Britanije te nevladine organizacije Centri civilnih inicijativa.

Predsjedavajući Beriz Belkić obrazložio je izmjene i dopune predloženog dnevnog reda. Zatim je, s obzirom da je Komisija za pripremu izbora Vijeća ministara BiH održala sjednicu i dala mišljenje, predložio da se dnevni red dopuni tačkom: Potvrđivanje Odluke predsjedavajućeg Vijeća ministara BiH o imenovanju Rude Vidovića za ministra komunikacija i prometa BiH.

Denis Bećirović predložio je dopunu dnevnog reda tačkom: Razmatranje zaključaka o štetnosti antidejtonskog i jednostranog djelovanja predsjednika Republike Srbije Borisa Tadića u državi Bosni i Hercegovini.

Povodom ovog prijedloga za dopunu dnevnog reda vođena je rasprava u kojoj su učestvovali: Branko Dokić, Momčilo Novaković, Remzija Kadrić, Jozo Križanović, Ekrem Ajanović, Mirko Okolić, Drago Kalabić, Denis Bećirović, Sadik Ahmetović, Slavko Jovičić, Adem Huskić i Milorad Živković.

Sefer Halilović predložio je da se, uz Privremeni izvještaj Istražne komisije za utvrđivanje trošenja donatorskih sredstava, razmatra i mišljenje Komisije za finansije i budžet o tom izvještaju. Također je predložio da se, s obzirom da su svi članovi Istražne komisije potpisali Prijedlog zakona o izmjenama i dopunama Zakona o slobodi pristupa informacijama u BiH sa zahtjevom za razmatranje po skraćenom postupku, dnevni red dopuni ovom tačkom.

Predsjedavajući je rekao da će se, u skladu sa zaključkom Doma, uz Privremeni izvještaj, razmatrati mišljenje Komisije za finansije i budžet u kojem su predviđeni modaliteti finansiranja. U vezi s drugim prijedlogom Sefera Halilovića, predsjedavajući je kazao da on još nije dostavljen Kolegiju, te da će biti uvršten u dnevni red naredne, 57. sjednice, koja će biti održana 8. jula 2009.

Nakon toga, predsjedavajući je dao na glasanje prijedloge za dopunu dnevnog reda. S 29 glasova „za“ (iz Federacije BiH 21, iz Republike Srpske osam), bez glasova „protiv“ i tri „suzdržana“ glasa, usvojen je prijedlog predsjedavajućeg da se kao osma tačka dnevnog reda razmatra: Potvrđivanje Odluke predsjedavajućeg Vijeća ministara BiH o imenovanju Rude Vidovića za ministra komunikacija i prometa BiH.

„Za“ prijedlog dopune dnevnog reda Denisa Bećirovića glasalo je 19 poslanika (iz Federacije BiH 17, iz Republike Srpske dva), „protiv“ osam, „suzdržanih“ šest. Predsjedavajući je konstatirao da nema potrebne entitetske većine i da će Kolegij naknadno obaviti usaglašavanje o ovom prijedlogu.

Predsjedavajući je za 56. sjednicu Predstavničkog doma konstatirao sljedeći

**DNEVNI RED**

1. Usvajanje Zapisnika 55. sjednice Predstavničkog doma;
2. Poslanička pitanja:
  - a) Komentari na dobivene odgovore,
  - b) Nova poslanička pitanja,
3. Zahtjev Vijeća ministara BiH za razmatranje Prijedloga zakona o izmjenama i dopunama Zakona o plaćama i naknadama u institucijama BiH po hitnom postupku, u skladu s članom 127. Poslovnika;
4. Prijedlog zakona o izmjeni Zakona o ministarstvima i drugim organima uprave BiH (drugo čitanje);
5. Prijedlog zakona o izmjenama i dopunama Zakona o konkurenciji (drugo čitanje);
6. Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović (prvo čitanje);
7. Izvještaj komisije Kolegija o nastojanju za postizanje saglasnosti o Prijedlogu zakona o kontroli vanjskotrgovinskog prometa robe i usluga od strateške važnosti za sigurnost BiH (drugo čitanje);
8. Potvrđivanje Odluke predsjedavajućeg Vijeća ministara BiH o imenovanju Rude Vidovića za ministra komunikacija i prometa BiH;
9. Prijedlog odluke o izmjeni Odluke o osnivanju Vijeća nacionalnih manjina BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku);
10. Prijedlog odluke o dopuni Odluke o imenovanju članova Vijeća nacionalnih manjina BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku);
11. Godišnja platforma o sigurnosno -obavještajnoj politici (podnosilac: Predsjedništvo BiH);
12. Izvještaj revizije učinka o temi: Proces zapošljavanja državnih službenika u institucijama BiH (podnosilac: Ured za reviziju institucija BiH);
13. Privremeni izvještaj Istražne komisije za utvrđivanje trošenja donatorskih sredstava;
14. Konačan predlog autentičnog tumačenja člana 185. stav (1) Zakona o službi u Oružanim snagama BiH („Službeni glasnik BiH“, br. 88/05);
15. Izjašnjavanje o inicijativi poslanika Remzije Kadrića i Adema Huskića za raspravu na sjednici Doma o temi: Dostignuti nivo provođenja Općeg okvirnog sporazuma za mir u Bosni i Hercegovini;
16. Razmatranje:
  - a) ostavke poslanika Milorada Živkovića na članstvo u Istražnoj komisiji za utvrđivanje trošenja donatorskih sredstava;
  - b) imenovanja poslanika Slavka Jovičića za člana Istražne komisije za utvrđivanje trošenja donatorskih sredstava (umjesto poslanika Milorada Živkovića);
17. Razmatranje:
  - a) ostavke poslanika Sefera Halilovića na članstvo u Zajedničkoj komisiji za ljudska prava, prava djeteta, mlade, imigraciju, izbjeglice, azil i etiku;
  - b) imenovanja poslanika Rifata Dolića za člana Zajedničke komisije za ljudska prava, prava djeteta, mlade, imigraciju, izbjeglice, azil i etiku (umjesto poslanika Sefera Halilovića);
18. Imenovanje tri člana u Zajedničku komisiju oba doma radi usaglašavanja teksta Zakona o izmjenama i dopunama Zakona o graničnoj policiji BiH;
19. Davanje saglasnosti za ratifikaciju:
  - a) Sporazuma između Vijeća ministara BiH i Vijeća ministara Republike Albanije o saradnji u borbi protiv kriminala, posebno terorizma, ilegalne trgovine drogom i organiziranog kriminala.

**Ad. 1. Usvajanje Zapisnika 55. sjednice Predstavničkog doma**

Predsjedavajući je konstatirao da je Zapisnik dostavljen poslanicima.

Zapisnik 55. sjednice usvojen je sa 31 glasom „za“ (iz Federacije BiH 22, iz Republike Srpske devet), jednim „protiv“ i bez „suzdržanih“ glasova.

## Ad. 2. Poslanička pitanja

Odgovore su komentirali: Rifat Dolić, Husein Nanić, Slavko Matić i Niko Lozančić.

U okviru komentara na dobijene odgovore, **Rifat Dolić** je, nezadovoljan odgovorom Vijeća ministara BiH na pitanje postavljeno na 50. sjednici Doma, dopunio ranije postavljeno pitanje:

„Iako ovaj odgovor zaslužuje zahvalnost zbog obima uloženog truda i dobivenih podataka, ipak je on kontradiktoran i ja bih želio neposredno komunicirati po ovome pitanju sa osobom u Vijeću ministara koja je radila odgovor na ovo pitanje, da dobijem neka dodatna pojašnjenja. Nakon ovog odgovora moram postaviti pitanje – **Da li je iko u ovoj državi odgovarao zbog 17 miliona KM plaćene kaznene kamate za odobrene, a na vrijeme neiskorištene kredite“?**

Postavljena su nova poslanička pitanja kako slijedi:

### **Mirko Okolić:**

„Od kojih proizvođača i uvoznika se može naći pogonsko gorivo na tržištu BiH i ko kontrolira uvoz i kvalitet pogonskog goriva, odnosno ko garantira za njegov kvalitet“?

### **Halid Genjac:**

„Poznato je da testno izdavanje biometrijskih pasoša počinje 1. jula, a redovno izdavanje tek 1. januara naredne godine i to je veoma dug, neobično dug period testiranja. Zato postavljam pitanje – Zbog čega je određen toliko dug, od šest mjeseci, period trajanja testiranja sistema za izdavanje biometrijskih pasoša? Kolike su zalihe obrazaca aktuelnih putnih isprava BiH, kad je bila posljednja narudžba, koliko ih je bilo i koliko su koštale? I da li stanje tih zaliha utiče na odluku o početku izdavanja biometrijskih pasoša?“

### **Slavko Jovičić:**

„Kada će biti održana posebna sjednica Predstavničkog doma, a odustao sam od zajedničke u konsultacijama i u razgovoru s vama? Želim da podsjetim, 3.novembra na sjednici Predstavničkog doma postignuta je apsolutna saglasnost da raspravljamo samo o ekonomskim temama i o krizi i recesiji.“

### **Husein Nanić:**

„Šta je preduzelo Vijeće ministara BiH da se otvori granični prijelaz Skelani i kada će taj prijelaz biti potpuno stavljen u funkciju?“

### **Azra Alajbegović:**

„U kojoj je fazi realizacija projekta izgradnje Autoputa Koridor Vc? U isto vrijeme molim da mi Ministarstvo prometa i komunikacija BiH dostavi izvještaj koji se odnosi na takse na nepovučena sredstva u periodu od 1978. do 2008. godine, a vezano za namjenski kredit za rekonstrukciju puteva, kao i izvještaje koje su entiteti dostavili Ministarstvu finansija i trezora BiH upućene 20.3.2009., a odnosili su se na ova utrošena sredstava.“

### **Adem Huskić:**

„U kojoj fazi je Prijedlog zakona o prijevozu opasnih materija, budući da se i on nalazi u setu zakona vezanih za liberalizaciju viznog režima?“

### **Rifat Dolić:**

„1. Kojim propisima i na kojem nivou je regulirano i iz kojih sredstava se u BiH vrši isplata sportskih penzija i stipendija za zaslužne sportiste i nosioce olimpijskih svjetskih odlikovanja?

2. Na koji način je u postojećim strategijama izgradnje saobraćajnica u Federaciji BiH i na nivou BiH predviđeno povezivanje zapadne Bosne s drugim dijelovima BiH ili BiH s Hrvatskom i

zemljama EU preko Unsko-sanskog kantona u narednih 10 godina, da li je BiH uključena u dosadašnje razgovore o izgradnji tzv. razvojnog koridora koji navodno od Linca preko Ljubljane, Novog Mesta, Karlovca, Bihaća, Sarajeva, Prištine i dalje preko Istambula, vodi na Bliski Istok?“

**Slavko Matić:**

„Koji su razlozi da u općinama Bosanski Brod, Šamac, Modriča, Derвента kao i u nekim drugim, nisu realizirana sredstva iz Fonda za povratak, odobrena još u prošloj, 2008. godini?“

**Salko Sokolović:**

„1. Kada će početi procedura izbora i imenovanja direktora BHMACE-a? Za one koji se možda ne mogu sjetiti u ovom momentu šta je to, to je institucija koja se bavi uklanjanjem minskoeksplozivnih sredstava.

2. Kada će gospodin Alagić, pa samim tim i nadležno ministarstvo i agencija u kojoj je radio, saznati da je protiv njega obustavljena istraga, da bi se mogao vratiti na posao?“

Ministar civilnih poslova BiH Sredoje Nović na sjednici je usmeno odgovorio na pitanja Halida Genjca, na prvo pitanje Rifata Dolića i prvo pitanje Salka Sokolovića.

Ministar sigurnosti BiH Tarik Sadović odgovorio je na pitanje Huseina Nanića, ali on nije bio u potpunosti zadovoljan odgovorom, tako da je pitanje u pisanoj formi proslijeđeno ministru sigurnosti BiH.

**Ad. 3. Zahtjev Vijeća ministara BiH za razmatranje Prijedloga zakona o izmjenama i dopunama Zakona o plaćama i naknadama u institucijama BiH po hitnom postupku, u skladu s članom 127. Poslovnika**

Predsjedavajući je dao uvodne napomene.

U raspravi su učestvovali: Momčilo Novaković, Mirko Okolić i Slavko Jovičić.

Zahtjev za hitni postupak nije usvojen - „za“ je glasalo 12 poslanika, „protiv“ 13 i devet je bilo „suzdržanih“. Zatim je predsjedavajući dao na glasanje prijedlog da se Zakon razmatra u skraćenoj proceduri, u skladu s članom 126. Poslovnika. S 25 glasova „za“ (iz Federacije BiH 18, iz Republike Srpske sedam), tri „protiv“ i šest „suzdržanih“, odlučeno je da se Prijedlog zakona o izmjenama i dopunama Zakona o plaćama i naknadama u institucijama BiH razmatra po skraćenom postupku.

**Ad. 4. Prijedlog zakona o izmjeni Zakona o ministarstvima i drugim organima uprave BiH (drugo čitanje)**

Predsjedavajući je u uvodnim napomenama rekao da je Ustavnopravna komisija prihvatila Zakon u predloženom tekstu. Nije bilo rasprave.

Prijedlog zakona o izmjeni Zakona o ministarstvima i drugim organima uprave BiH usvojen je u drugom čitanju sa 33 glasa „za“ (iz Federacije BiH 23, iz Republike Srpske 10), bez glasova „protiv“ i jednim „suzdržanim“ glasom.

**Ad. 5. Prijedlog zakona o izmjenama i dopunama Zakona o konkurenciji (drugo čitanje)**

Predsjedavajući je rekao da je Vijeće ministara BiH dostavilo ispravku obrazloženja člana 10. Prijedloga zakona, te da je nadležna komisija dostavila svoj izvještaj.

Nije bilo rasprave.

Prijedlog zakona o izmjenama i dopunama Zakona o konkurenciji usvojen je u drugom čitanju jednoglasno - sa 34 glasa „za“ (iz Federacije BiH 24, iz Republike Srpske 10).

**Ad. 6. Prijedlog zakona o izmjenama i dopunama Zakona o sportu u BiH, predlagač: poslanik Denis Bećirović (prvo čitanje)**

Nije bilo rasprave nakon uvodnih napomena predsjedavajućeg.

Dom je jednoglasno - sa 32 glasa „za“ (iz Federacije BiH 24, iz Republike Srpske osam) - u prvom čitanju usvojio Prijedlog zakona o izmjenama i dopunama Zakona o sportu u BiH.

**Ad. 7. Izvještaj komisije Kolegija o nastojanju za postizanje saglasnosti o Prijedlogu zakona o kontroli vanjskotrgovinskog prometa robe i usluga od strateške važnosti za sigurnost Bosne i Hercegovine (zakon u drugom čitanju)**

Predsjedavajući je podsjetio da Kolegij nije postigao saglasnost.

U drugom krugu glasanja Prijedlog zakona o kontroli vanjskotrgovinskog prometa robe i usluga od strateške važnosti za sigurnost Bosne i Hercegovine usvojen je u drugom čitanju s 23 glasa „za“, šest „protiv“ (iz Republike Srpske) i tri „suzdržana“. Time je usvojen i jedan amandman koji je usvojila nadležna komisija.

**Ad. 8. Potvrđivanje Odluke predsjedavajućeg Vijeća ministara BiH o imenovanju Rude Vidovića za ministra komunikacija i prometa BiH**

Predsjedavajući je kazao da je Komisija za pripremu izbora Vijeća ministara BiH dala pozitivno mišljenje o Odluci Predsjedavajućeg Vijeća ministara BiH.

Nije vođena rasprava.

Dom je, s 28 glasova „za“ (iz Federacije BiH 19, iz Republike Srpske devet), dva „protiv“ i tri „suzdržana“, potvrdio Odluku predsjedavajućeg Vijeća ministara BiH o imenovanju Rude Vidovića za ministra komunikacija i prometa BiH, nakon čega je Rudo Vidović dao svečanu izjavu.

**Ad. 9. Prijedlog odluke o izmjeni Odluke o osnivanju Vijeća nacionalnih manjina BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku)**

Predsjedavajući je dao uvodne napomene.

Kratko su diskutirali Mehmed Suljkanović i Sadik Ahmetović.

Prijedlog odluke o izmjeni Odluke o osnivanju Vijeća nacionalnih manjina BiH usvojen je jednoglasno - sa 33 glasa „za“ (iz Federacije BiH 23, iz Republike Srpske 10).

**Ad. 10. Prijedlog odluke o dopuni Odluke o imenovanju članova Vijeća nacionalnih manjina BiH (predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku)**

Predsjedavajući je dao uvodne napomene o Prijedlogu odluke.

Nije bilo rasprave.

Dom je, s 32 glasa „za“ (iz Federacije BiH 23, iz Republike Srpske devet), bez glasova „protiv“ i dva „suzdržana“, usvojio Prijedlog odluke o dopuni Odluke o imenovanju članova Vijeća nacionalnih manjina BiH, kojom se iz crnogorske nacionalne manjine u Vijeće nacionalnih manjina BiH imenuje Hidajeta Redžić na period od dana stupanja na snagu ove odluke do 30.4.2010., a Neđeljko Tomašević od 1.5.2010. do kraja mandata izabranih članova ovog saziva Parlamentarne skupštine BiH.

## **Ad. 11. Godišnja platforma sigurnosno-obavještajne politike (podnosilac: Predsjedništvo BiH)**

Predsjedavajući je dao uvodne napomene.

U raspravi su učestvovali: Slavko Jovičić, Remzija Kadrić, Mirko Okolić i Milorad Živković.

Godišnja platforma o sigurnosno-obavještajnoj politici usvojena je sa 30 glasova „za“ (iz Federacije BiH 22, iz Republike Srpske osam), bez glasova „protiv“ i četiri „suzdržana“ glasa.

Na prijedlog Mirka Okolića iznesen u raspravi, jednoglasno (sa 34 glasa „za“ – iz Federacije BiH 24, iz Republike Srpske 10), usvojen je sljedeći zaključak:

**„Na osnovu člana 2. Zakona o izmjenama i dopunama Zakona o obavještajno-sigurnosnoj agenciji BiH, „Službeni glasnik BiH“, br. 12/09, traži se od Vijeća ministara BiH a sugerira Predsjedništvu BiH da Platformu obavještajno-sigurnosne politike za 2010. godinu u parlamentarnu proceduru dostave najkasnije do 1.11.2009.“**

Dom je, na prijedlog Zajedničke komisije za nadzor nad radom OSABiH, usvojio dopunu Godišnje platforme i to s 28 glasova „za“ (iz Federacije BiH 22, iz Republike Srpske šest), bez glasova „protiv“ i pet „suzdržanih“, a dopuna glasi:

**„U Glavi III 3. TERORIZAM I RADIKALNA DJELOVANJA u podnaslovu RADIKALNA DJELOVANJA u trećem redu, iza riječi „na“ stavljaju se dvije tačke i dodaju riječi: „djelovanje protiv države Bosne i Hercegovine“.“**

## **Ad. 12. Izvještaj revizije učinka o temi: Proces zapošljavanja državnih službenika u institucijama BiH (podnosilac: Ured za reviziju institucija BiH)**

Nakon uvodnih napomena predsjedavajućeg, u raspravi su učestvovali: Sadik Bahtić, Šefik Džaferović, Milorad Živković, Selim Bešlić i vođa tima za reviziju učinka Fadila Ibrahimović.

Izvještaj iz ove tačke dnevnog reda usvojen je s 31 glasom „za“ (iz Federacije BiH 22, iz Republike Srpske devet), bez glasova „protiv“ i jednim „suzdržanim“ glasom. Time su usvojena četiri zaključka iz mišljenja Komisije za finansije i budžet.

Zatim je jednoglasno (sa 30 glasova „za“ – iz Federacije BiH 20, iz Republike Srpske 10) usvojen prijedlog zaključka Šefika Džaferovića iznesen u raspravi.

Usvojeni zaključci glase:

### **1. Zadužuje se Vijeće ministara BiH da:**

- kroz pilot-projekte razmotri sistem zapošljavanja, utvrdi eventualne nedostatke i predloži adekvatne izmjene,
- raspravlja o Izvještaju revizije učinka i o zauzetim stavovima informira Parlamentarnu skupštinu BiH, te dostavi analizu o zaposlenosti u institucijama BiH, s posebnim osvrtom na ukupan broj zaposlenih, nacionalnu strukturu i njihovu stručnu osposobljenost.

### **2. Zadužuje se Agencija za državnu službu BiH (u daljnjem tekstu: Agencija) da:**

- Vijeću ministara BiH osigura i dostavi potpune informacije o sistemu zapošljavanja i sadašnjem načinu njegovog funkcioniranja, te postojećim problemima neefikasnosti tog procesa u pojedinim njegovim fazama (blagovremenost, priprema oglasa i imenovanje komisija za izbor);
- uspostavi odgovarajući sistem informiranja i komunikacije s institucijama koje vrše zapošljavanje;
- kroz raspoložive vidove komunikacije s institucijama BiH koje vrše zapošljavanje, pribavlja jasne informacije o uslovima i zahtjevima predmetnog zapošljavanja neophodne za pripremu oglasa i imenovanje članova komisije u Agenciji;
- uspostavi bazu podataka s adekvatnim informacijama o sistemu zapošljavanja i načinu na koji sistem funkcionira, uključujući različite pojedine faze kao i različite kategorije upražnjenih radnih mjesta, pri čemu Agencija ne bi trebalo da bude odgovorna za provođenje ovih aktivnosti.

### **3. Zadužuju se institucije BiH koje vrše zapošljavanje novih kadrova da:**

- s Agencijom uspostave odgovarajući sistem razmjene informacija,
- aktivnije uključe menadžment u procese zapošljavanja,

- realno planiraju zapošljavanje državnih službenika u skladu sa svojim internim pravilnicima i odobrenom budžetskom stavkom za tu svrhu,
  - budžet planiraju na osnovu realnih parametara, kao što su jasni ciljevi i aktivnosti i njihova realizacija s rokovima izvršenja, i stvarne potrebe za materijalnim resursima i ljudskim potencijalima za ispunjenje utvrđenih ciljeva.
4. **Zadužuje se Ministarstvo finansija i trezora BiH da insistira kod budžetskih korisnika da, prilikom podnošenja prijedloga zahtjeva za finansiranje, obavezno dostave plan rada i poslovanja, sve s ciljem praćenja realizacije plana rada i poslovanja i opravdanja traženih sredstava.**
  5. **Zadužuje se Ured za reviziju institucija BiH da, u roku od šest mjeseci, Predstavničkom domu dostavi izvještaj o realizaciji njihovih preporuka, kao i preporuka Parlamentarne skupštine BiH.**  
(Zaključci od br. 1. do br. 4. sadržani su u mišljenju Komisije, a zaključak br. 5. usvojen je na prijedlog Šefika Džaferovića.)

#### **Ad. 13. Privremeni izvještaj Istražne komisije za utvrđivanje trošenja donatorskih sredstava**

Predsjedavajući je u uvodnim napomenama podsjetio na zaključak sa 53. sjednice Doma, održane 13. 5. 2009., kojim je Privremeni izvještaj Istražne komisije za utvrđivanje trošenja donatorskih sredstava upućen Komisiji za finansije i budžet radi donošenja stava o finansiranju projekta, nakon čega će biti uvršten u dnevni red sjednice Doma. Komisija je, 5.6.2009., dostavila Mišljenje o Privremenom izvještaju s prijedlogom zaključaka.

Kratko su diskutirali Remzija Kadrić i Adem Huskić.

Remzija Kadrić je u raspravi predložio zaključak o kojem se nije glasalo zato što to nije u skladu s odredbama Poslovnika, jer se njime mijenja jedan opći akt koji regulira ne samo ovaj pojedinačni slučaj nego i druge situacije, a tiče se odricanja od naknade za rad poslanika koji su članovi Istražne komisije. Adem Huskić odrekao se naknade za rad u ovoj komisiji.

Predsjedavajući je kazao da svaki od članova komisije može odlučiti da se odrekne naknade.

Privremeni izvještaj Istražne komisije za utvrđivanje trošenja donatorskih sredstava usvojen je s 31 glasom „za“ (iz Federacije BiH 24, iz Republike Srpske sedam), bez glasova „protiv“ i tri „suzdržana“ glasa. Time je usvojeno i Mišljenje Komisije za finansije i budžet sa sljedećim zaključcima:

1. **Parlamentarna skupština BiH, kao budžetski korisnik, u skladu s članom 15. Zakona o Budžetu institucija BiH i međunarodnih obaveza BiH za 2009. godinu, upućuje prijedlog Vijeću ministara BiH da u što kraćem vremenskom periodu iz budžetske rezerve odobri izdvajanje sredstava u iznosu od 41.291,76 KM, za potrebe finansiranja Projekta „Utvrdjivanje trošenja donatorskih sredstava“ Istražne komisije Predstavničkog doma Parlamentarne skupštine BiH.**
2. **Zadužuje se Istražna komisija za utvrđivanje trošenja donatorskih sredstava Predstavničkog doma Parlamentarne skupštine BiH da izvijesti Predstavnički dom Parlamentarne skupštine BiH o načinu utroška odobrenih sredstava.**

Da bi se realizirao zaključak broj 1. neophodno je da ga usvoji i Dom naroda, zbog čega je i upućen Domu naroda na razmatranje i usvajanje.

#### **Ad. 14. Konačan prijedlog autentičnog tumačenja člana 185. stav (1) Zakona o službi u Oružanim snagama BiH („Službeni glasnik BiH“, br. 88/05)**

Predsjedavajući je u uvodnim napomenama rekao da je održana zajednička sjednica ustavnopravne komisije oba doma na kojoj je razmatran i ovaj prijedlog autentičnog tumačenja koji je utvrdila Zajednička komisija za odbranu i sigurnost BiH, a koji je dostavljen Domu na razmatranje.

U okviru ove tačke diskutirao je Šefik Džaferović, predsjedavajući Ustavnopravne komisije.

Dom je, s 31 glasom „za“ (iz Federacije BiH 23, iz Republike Srpske osam), bez glasova „protiv“ i jednim „suzdržanim“, na prijedlog Ustavnopravne komisije, usvojio autentično tumačenje člana 185. stav (1) Zakona o službi u Oružanim snagama BiH („Službeni glasnik BiH“, br. 88/05).

#### **Ad. 15. Izjašnjavanje o inicijativi poslanika Remzije Kadrića i Adema Huskića za raspravu na sjednici Doma o temi: Dostignuti nivo provođenja Općeg okvirnog sporazuma za mir u BiH**

Predsjedavajući je kazao da je Ustavnopravna komisija dala pozitivno mišljenje o ovoj inicijativi. Diskutirali su Remzija Kadrić i Milorad Živković.

Prilikom glasanja, „za“ je bilo 26 poslanika (iz Federacije BiH 23, iz Republike Srpske tri), glasova „protiv“ nije bilo, a osam poslanika bilo je „suzdržano“. Predsjedavajući je konstatirao da nedostaje enitetska većina iz Republike Srpske i da će Kolegij naknadno obaviti usaglašavanje.

#### **Ad. 16. Razmatranje:**

- a) **ostavke poslanika Milorada Živkovića na članstvo u Istražnoj komisiji za utvrđivanje trošenja donatorskih sredstava;**
- b) **imenovanja poslanika Slavka Jovičića za člana Istražne komisije za utvrđivanje trošenja donatorskih sredstava (umjesto poslanika Milorada Živkovića)**

Predsjedavajući je dao uvodne napomene. Nije bilo rasprave.

S 25 glasova „za“ (iz Federacije BiH 16, iz Republike Srpske devet), dva „protiv“ i šest „suzdržanih“, poslanik Milorad Živković razriješen je članstva u Istražnoj komisiji za utvrđivanje trošenja donatorskih sredstava.

Zatim je, s 26 glasova „za“ (iz Federacije BiH 17, iz Republike Srpske devet), dva „protiv“ i tri „suzdržana“, poslanik Slavko Jovičić imenovan za člana ove komisije.

#### **Ad. 17. Razmatranje:**

- a) **ostavke poslanika Sefera Halilovića na članstvo u Zajedničkoj komisiji za ljudska prava, prava djeteta, mlade, imigraciju, izbjeglice, azil i etiku;**
- b) **imenovanja poslanika Rifata Dolića za člana Zajedničke komisije za ljudska prava, prava djeteta, mlade, imigraciju, izbjeglice, azil i etiku (umjesto poslanika Sefera Halilovića)**

Nakon uvodnih napomena predsjedavajućeg, nije bilo rasprave.

Dom je, s 17 glasova „za“ (iz Federacije BiH 10, iz Republike Srpske sedam), 12 „protiv“ i pet „suzdržanih“, razriješio poslanika Sefera Halilovića članstva u Zajedničkoj komisiji za ljudska prava, prava djeteta, mlade, imigraciju, izbjeglice, azil i etiku, a zatim je u ovu komisiju, s 31 glasom „za“ (iz Federacije BiH 22, iz Republike Srpske devet), jednim „protiv“ i dva „suzdržana“, imenovao poslanika Rifata Dolića.

#### **Ad. 18. Imenovanje tri člana u Zajedničku komisiju oba doma radi usaglašavanja teksta Zakona o izmjenama i dopunama Zakona o graničnoj policiji BiH**

U Zajedničku komisiju iz ove tačke, s 27 glasova „za“, (iz Federacije BiH 19, iz Republike Srpske osam), bez glasova „protiv“ i šest „suzdržanih“, imenovani su: **Adem Huskić, Velimir Jukić i Željko Kuzmanović.**



**Ad. 19. Davanje saglasnosti za ratifikaciju:****a) Sporazuma između Vijeća ministara BiH i Vijeća ministara Republike Albanije o saradnji u borbi protiv kriminala, posebno terorizma, ilegalne trgovine drogom i organiziranog kriminala**

Predsjedavajući je rekao da je Komisija za vanjske poslove dala pozitivno mišljenje o davanju saglasnosti za ratifikaciju ovog sporazuma.

Saglasnost za ratifikaciju Sporazuma data je jednoglasno - sa 34 glasa „za“ (iz Federacije BiH 24, iz Republike Srpske 10).

Time je realiziran dnevni red.

Predsjedavajući je podsjetio da će 57. sjednica Doma biti održana 8. jula, a 3. posebna zajednička sjednica oba doma Parlamentarne skupštine BiH „Delegati/poslanici pitaju – Vijeće ministara BiH odgovara“ 14. jula 2009, kada je planirano i održavanje 13. zajedničke sjednice oba doma na kojoj će se razmatrati: Informacija o stanju i razvoju DKP mreže i Prvi kvartalni pregled realizacije aktivnosti iz Akcionog plana za realizaciju prioriteta iz dokumenta Evropsko partnerstvo sa BiH i Izvještaja o stanju provođenja obaveza iz Privremenog sporazuma i SSP-a.

Sjednica je završena u 14,25 sati.

Sastavni dio Zapisnika je transkript 56. sjednice Predstavničkog doma.

SEKRETAR  
PREDSTAVNIČKOG DOMA  
**Branka Todorović**

PREDSEDVAJUĆI  
PREDSTAVNIČKOG DOMA  
**Beriz Belkić**